

Ic, Steven Vanden Kerchove, stadthoudere Jans Van Thienen, rentmeester ons genaeden heeren den keijsere, vander Vuere ende van Vilvoirden inden quartiere van Campenhout, dien condit eenen ijegelijcken dat opten dach van heden voer mij ende voer die eijgenoten hier naer genoempt, te wetene Jan Van Espen, Rombout Verbuecken, Jan Putteman ende Chaerle Vanden Kerchove comen es in propren persoene heer Pieters Noes, priester, ende wettich zoene wijlen Jans ende heeft op gedraeghen metten halme in mijne handen als in handen ons voirschreven genaeden heeren des keijsers als heer vanden grondt hier overstaende, daer oppe woirpende ende wettelijcke verthijende voor hem ende zijne naecomelingen tot behoeff Gielis Vanden Bossche ende Jennen tSwalssche zijnder wettiger huijsvrouwe, sesse dachwant bosch luttel min oft meer alsoe die gelegen zijn inde prochie van Campenhout bij Lobs Cruijse metten zijden aende goeden joncheeren Aerds De Boourchgraeve, comende metter derder zijden aende waterloop aldaer ende meter vierder zijden aende goeden des voerschreven Pieters Noels, hen aldaer genoeg bewijst voor eijgen ende voirts op eenen huere van sdrije Karolus guldenen ende thien stuijvers erffelijcken ende nijet te quitene twintich stuijvers voer elcken Karolus gulden ende drije Grootte Brabanrts voer elcke stuijver gerekent, die de beghijnen van Loevene daer jaerlijcx op heffende zijn. Soe ende in alder manieren als die voirschreven beghijnen van Loeven die voerschreven zesse dachwanden bosch den voerschreven Pieteren Noes opten voirschreven commere eeuwelijcke ende erffelijcke vuyt *gegheven* hebben gehad; alsoe tselve al bredere blijkt bij den bescheedt daer aff zijnde. Ende die voirschreven coope die zij hier dus geguedt ende geërfte voer hen ende haeren naecomelinge eeuwelijcke ende emmermeer te bezitten ende te gebruijcken opten voerschreven commere van drije Karolus gulden ende thien stuijvers eerffelijcken. Gelovende die voerschreven vercooper den bovengenoempden cooper hier aff waerschap ende altijt genoeg te doen op datter ijete aene gebraecke ende die voirschreven coopen die geloefden schot ende loth ende dorpsrecht . Dits al geschiet bij mijnen manisse ende bij wijsdomme der eijgenoten bovengescreven ende met alle poincten ende solemnitijten van rechte die daer inne behoerden ende schuldich waerfen toe te geschieden ende ne gheen poinct van rechte hier inne versuempt noch achter gelaeten ten was voldaan ende des toirconden soe hebbe ick Steven Vanden Kerchove bovengenoempt mijnen propren zegele deser letteren aengehangen ende hebbe voirts ver-soxcht drije eigenoten bovengescreven dat zij met mij om meerdere zekerheijt ende vasticheijt van tgheen e des voirschreven staet dese letteren oick soudent willen bezegelen, dwelck wij eijgenoten bovengescreven ten suenderlinge versuecke des voirschreven stadthoudere ende vuyt beede van beijden den voirschreven paertijen gedaen hebben elck van ons met onsen propren zegele hier onder aenhangende bij den zegele des voirschreven stadthoudere. Behoudelijck onsen voirschreven genaeden heere den keijsere zijnder hooger heerlijcheijt ende eenen ijegelijcken anders zijner goeden rechte altijt in alle dinghen. Gedaen opten eenentwintichsten dach van octobrij int jaer ons lefs¹ heeren als men screeff duijsent vijffhondert neghen ende dertich.

21/10/1539